

四庫全書

史部

欽定四庫全書

史部

太平治迹統類卷二十七

詳校官編修_臣邱庭澐

編修_臣裴謙覆勘

總校官知縣_臣楊懋珩

校對官中書_臣孫球

謄錄監生_臣李炎

欽定四庫全書

太平治迹統類卷二十七

宋 彭百川 撰

祖宗科舉取人

建隆元年安次扈蒙權知貢舉庚寅奏進士合格十九

人

楊礪同立辭

二年權知貢舉實儀奏進士合格十一人

張

等二年知貢舉王著奏合格進士七十五人

馬適等

九月

復置書判拔萃科四年知貢舉儀薛居正奏合格進士

八人

蘇德祥等

乾德元年九月丙子詔禮部貢舉人自今朝臣不得更發公薦違者重寘其罪故事每歲知舉官將赴貢院臺閣近臣得保薦文藝者號曰公薦然去取不能無私至是禁止聞十二月丁卯召翰林學士中書舍人於內殿覆試吏部試中應拔萃科

田可封孫邁宋白曹利用

上臨軒觀之試

畢稱旨以利用為右拾遺田為著作郎各賜襲衣犀帶

利用加錫鞍勒馬

二年正月詔曰先以所置賢能方正能直言極諫經學
優深可為師法詳嫻吏治達於教化等三科並委州府
解送吏部試論三道限三千字以上自曩及今未有應
者得非抱倜儻者恥肩於常調懷讜言者難動於有司
必欲興自朕躬乎繼今不限內外職官前資見任布衣
黃衣並許詣閣門投牒自薦朕當親試焉三月知貢舉
陶穀奏合格進士八人
李景陽等四月賢良科一人博州判
官穎贄策試稱旨故也

三年知貢舉盧多遜奏合格進士六人

劉察等

四年王祐知貢舉言進士合格者六人諸科幾人上恐其有遺才復令於不中選人內取優長者策而升之

李肅

畢士安等

開寶元年王祐知貢舉奏進士合格者十人陶穀子邴名在第六翌日入謝上謂左右曰聞穀不能訓子安能登第因下詔曰造士之選匪樹私恩世祿之家宜敦素業如開黨與頗苦切吹文衡公器豈有私濫自今舉人

凡關食祿之家具折以聞當令覆試

陶郃覆試復登第

二年知

貢舉趙逢奏進士合格七人

是月親征逢隨軍轉運使取士或在行宮當考安德

裕柴成務王猷可董循張紳陶郃係元年所得士

三年三月壬寅詔禮部貢院

閱貢士諸科十五舉以上曾終場者以名聞甲辰得司

馬浦等六十三人庚戌復取未經場人四十三人並賜

出身詔自今勿以為例知貢舉扈蒙擢進士合格者八

人

張拱王誨張茂直等

四年盧多遜知貢舉奏進士合格者十人

劉寅衛價劉瓊等

五年扈蒙知貢舉奏合格進士安守亮等十

一人諸科二十人詣講武殿上以進士武濟川材質最陋絀之濟川乃學士李昉鄉人昉知貢舉上不悅會徐士廉訴昉用情取舍非當上以問學士盧多遜曰頗亦聞之上令貢院籍下第人姓名三百六十人癸酉召見擇一百九十五人宋準以下及士廉各賜紙札引試命御史李瑩等為考官乙亥上親閱得進士二十六人士廉與焉皆賜及第又賜準錢二十萬以張宴會責昉為太常少卿考官楊可法等皆坐責自茲殿試為常式宋

準賈源范翔郭成範張素左貞索箱李巨源武濟川裴
詢黃相是年重試宋準賈源范翔郭成範張素左貞裴
詢李巨源董箱劉總田寶之柳毗劉洗任載宋玄慶徐
士廉安肅趙白貞梁誼呂鏐王住王文範趙世南王利
用王渭五經四人開元禮七人三禮三十八人三傳二
十六人三史三人學究十八人夏四月詔諸州考試官
令長吏僚屬有才學公正者充知貢舉與考試同看詳
議卷定其通否即駁放不得優假虛名至終場中禁私

薦屬科人募告者其賞有差舉人勒還本貫重役永不
得入科場八月丁卯王祐知貢舉知制誥扈蒙左補闕
梁周翰秘書丞雷德驤並權同知貢舉權同貢舉始此
戊辰上御講武殿覆試王祐等所奏合格舉人王式等
因語之曰向登科名給多為勢家所取塞孤貧之路甚
無謂也今朕躬親臨試盡革疇昔之弊式等皆頓首謝
于是內出賦題得進士王嗣宗以下三十人諸科三十四
人江南進士林松雷說試不中格以其間道來歸並賜

三傳出身王侶宗王式劉克荷拔萃科乾德二年四人
建隆三年復置選人限格未至者各取本州解至吏部
試判二條分五等放選利用等吏部試中詔翰林學士
于內殿復試帝臨觀之賜襲衣金帶

乾興元年宋若谷以下六十五人

天聖三年林異以下四人六年常禹錫以下八十三人
九年蕭儉以下三十人

太宗

太平興國二年正月上初即位以封疆至遠吏員益衆
思廣振淹滯以資其間闕顧謂侍臣曰朕欲博求俊乂
于科場中非敢望拔十得五止得一二亦可為致治之
具爾禮部上所試合格人名上御講武殿出賦題覆試
依次用韻命翰林學士李昉扈蒙定其優劣得河南
呂蒙正王相李至張宏張齊賢王化基王沔溫仲舒一
百九十人並賜及第餘並賜出身凡五百人皆先賜綠
袍靴笏賜宴開寶寺上自為詩一章賜之唐時禮部放

榜之後釀飲今曲江號聞喜宴五代于名園佛舍中周顯德中官主之上命中使典領供帳甚盛第一第二等進士并九經授將作監丞大理寺評事通判諸州同出身及諸科並送吏部免選優等注擬初資職事則同簿尉寵章殊異歷代所未有也薛居正等言取人太多用人太驟上欲興文教抑武事弗聽及蒙正等辭乃召令升殿諭之曰吏治所有不便于民者疾置以聞仍賜錢二十萬或曰太祖之幸西京也洛陽張齊賢獻下并汾

富民封建敦孝舉賢太學籍田選良吏懲奸謹刑十策
太祖召見便坐問之齊賢以手畫地條陳太祖善其四
齊賢堅執其餘皆善太祖怒令衛士曳出及還語上曰
我幸西京惟得一張齊賢我不欲遂官爵之汝異時可
收以自輔也于是齊賢舉進士上決欲置之高等有司
第其名適在數十人後上不悅乃詔進士盡第二等及
九經凡一百三十人悉與超除蓋為賢故也

三年八月上先詔權罷貢舉恐場屋間有留滯者乃詔

諸州去年已得解者除三禮三傳學究外餘並以秋集
禮部九月上御講武殿覆試合格禮部人進入加論一
道餘人得無濫進者乎己巳詔自今諸科並令量定人
數相叅引試分科隔坐命官巡察監門謹視出入有以
文字往復與吏為奸者寘之于法私以經義相教者斥出
科場互保與知亦連坐進士倍加研覆貢舉人勿以曾
經御試不考而薦始令試官親戚別試者凡九十八人
又罷進士試帖經上御崇政殿覆試禮部貢舉人得進

士須城梁顥百七十九人庚申得諸科三百一十八人並唱名及第唱名自此始據登科記宰相李昉之子宗諤叅知政事呂蒙正之從弟蒙亨監贓使王明明之子扶度支使許仲宣子問舉進士試皆入等上曰此並勢家與孤寒競進縱以藝升人亦謂朕為有私也皆罷之青州人王從善應五經舉始踰冠自言通誦五經通注上歷舉本經試之其誦如流特賜九經及第面賜綠袍銀帶錢二萬時左右獻言尚有遺材壬戌復試又得進

士上元洪湛等七十六人癸亥得諸經科三百二人並
賜及第夏四月丙子復置明法科分周易尚書各為一
科以論語孝經爾雅三小經毛詩專為一科明法亦附
三小經進士九經以下更不習法書又以鑠廳求試者
率多繆濫令諸道州府自今擇材學優等而歷官無過

者乃舉之仍先奏俟報

甲科梁顥年八十二作狀元張
惟明裴湛錢若水陳允省元熙

乙科呂防李昉任中正閻丘陵令丙科趙安
仁陳彭年凌策宋惟善陳昭慶四等崔度

端拱元年夏四月丙申先是翰林學士禮部侍郎宋白

知貢舉放進士程宿以下二十八人諸科一百人榜既出謗議蜂起或擊登聞鼓求別試上意其遺材壬寅詔下第人覆試于崇政殿得進士馬國祥以下及諸科凡七百人令樞密院用白紙為牒賜之以試中為目令權知諸縣簿尉謂樞密副使張宏曰朕自即位以來親選貢士大者為棟梁小者為榱桷今封疆萬里人無棄材日思孜孜庶臻理學卿與蒙正曩者頗為大臣所沮非朕獨斷則不及此宏頓首謝曰凡三掌貢士所取如蘇

易簡王禹偁輩皆知名而罷黜者衆因致謗議時知制

誥李沆亦同知貢舉謗議獨不及

程宿省王元扶陳堯佐石成之諸科盧范

以下八十餘人

上既擢馬國祥等猶恐遺材復命左右正言王

世則等召下第進士及諸科于武成王廟重試得合格

進士數百人丁丑上覆試詩賦又拔進士葉齊以下三

十一人諸科八十九人並賜及第

葉齊江拯趙準等

雍熙二年三月先是翰林學士知貢舉蘇易簡等用親

試壬寅上御崇政殿試合格舉人得進士閤中

陳堯叟知白曾

欽定四庫全書

太平治道類
卷二十七

九

會姚揆蘇奐趙
楨張智盛度等

一百八十六人賜宴令兩制三館文臣
皆預賜堯叟等歲一首勉以修身謹行稽古服官之意
十二月上謂宰相曰國家取士歷級而升下位韜晦才
行多矣當勿以此為限庶朕急賢之志因言為人臣者
治平之代功效難見若亂世則止用其才不顧其行如
陳平韓信頃刻能立功業當治平則無所施其謀畧故
孔子四科以德行為長又言下位卑秩不可謂無良士
大凡孔子含章守道難進易退不求聞達故常患其不

能知也呂蒙正曰迭試事任則能否洞分上曰性之善惡何由知之蒙正曰人之為善終不能掩久則彌著至于為惡亦然苟暫聞善惡或涉愛憎恐誤任使必久而察之則賞罰無濫上善其言

淳化三年三月上御崇政殿覆試合格進士先是胡旦蘇易簡王世則梁顥陳堯叟皆以試先成擢上第由是士爭習浮華尚敏速或一刻數詩或一日十賦將作監丞莆田陳靖上疏請糊名考校以革其弊上嘉納之于是

召三館文學之士始令糊名考校定其優劣以分第綴
內出卮言日出賦題試者駭異不能措詞相率叩殿檻
上請會稽錢易時年十七日未中所試三題皆就言者

指其輕俊特點之得

孫何省元宋台符路振王欽
若丁度張士遜王曙薛奎等

以下

凡三百二人並賜及第上諭之曰爾等各負志業中我
廷選効官之外更勵精文翰勿墜前功也何等旅拜稱
謝辛丑覆試諸科就宴錫御製詩三首進士孫何而下
四人皆授將作監丞大理評事通判諸州餘及諸科授職

事州縣官入謝于長春殿上謂宰相曰天下至廣藉羣材共治之今歲登科第又千餘人皆朕所選擇此等但能自檢情美替而歸則馴政亨衢未可測也時詔刻禮記儒行篇賜大臣及百官受任于外者并賜何等令為坐右之誡初內殿策士賜詩至堯叟易以箴至何則詩箴並賜時論榮之

咸平元年翰林楊礪等受詔知貢舉請對上召坐詔之曰貢舉重任當務選推寒俊精求藝實以副朕心礪建

隆初榜首及第二月壬辰詔禮部貢院考試畢日錄合格人姓名以聞當議降敕放榜賜及第如覆試有濫謬知舉官重行朝典戊戌詔以久停貢舉頗滯時材令禮部取合格人內進士放孫僅等五十人諸科百五十人來歲不得為例舊制國子監開封舉人有與發解官親戚者止兩司更互考試不應涉私是秋特選官別試錢若水等覆考進士試卷故事京府解十人已上謂之等甲非文業優贍有名稱者不處時以高輔堯為首錢易

次之易頗為流輩所推許輒不平遂上書指陳發解官
所試官朽索馭六馬賦又論詩策題意涉譏訕又進士
百十人詣府訟薦送不公輔堯亦投牒遜避請以易為
首開封府以聞故有是命仍令兩制議所訟題時翰林
學士承旨宋白深祐易考官度支員外郎馮拯力言易士行
不可冠天府多士上以士流紛競不可啓其端且欲鎮
壓浮俗乃詔止拯罷兩制議及覆考止令若水等有文
行兼著者一人為首乃以孫暨等為第一輔堯第二易

第三餘並如初易初以輕俊被黜既而太宗與蘇易簡論當時文人且歎不與李白同時易簡言易能為歌詩殆不下李白太宗大喜曰果如是吾當以白衣召至禁林會盜起嶺南事乃止

二年正月乙丑命禮部尚書溫仲舒知貢舉御史中丞張詠知制誥張頴同知貢舉刑部員外郎董龜正王步同考試及封印卷首仍當日入院禮部貢院封印試卷自此始癸亥詔今歲舉人至衆仍依例恐有遺落可增

及七十人諸科增一百八十人禮部尋以孫暨等一百五十人名聞內諸科一舉六人特黜去之餘並賜及第五月詔天下貢舉人應三舉者今歲並免取解其餘依例舉送必求才藝不使遺賢當俟奏名朕親臨試

三年二月學士王旦等三人同知貢舉三月甲午上御崇政殿親試命翰林學士承旨宋白等於殿後西閣考覆國子監博士雷悅著作佐郎梅詢封印卷首親覽入

等賜

陳堯復周企李社二甲呂夷簡三甲任布四甲羌遵五甲石待問何宗朝等

四百九人

及第賜宴日以御詩褒美之上凡三日臨軒初無倦怠之色所擢凡千八百五人其中有自晉天福中隨計較藝之詳推恩之大近代所未有也四月賜應制舉人林陶同進士出身陶就試學士院不及格上方欲采俊茂故特獎之

五年三月上親試禮部舉人得進士益都王曾以下三十八人九經諸科百八十人並賜及第

王曾省元王隨韓億章得象等

先是貢舉人集都下者萬四千五百六十二命吏部陳

恕知貢舉恕所取士甚多以王曾為首及是糊名考授
曾復中甲科時議稱之十一月河陽判官張之白上疏
其一言科舉之弊畧云聖人居守文之運將致清化源
在乎正儒術古之學者簡而有限今之學者其書無涯
其道非一是故學彌多性彌亂今進士之科大為時所
進用其選也殊其待也厚進士之學者經史子集也有
司之取者詩賦策論也是故五常六藝之意不遑探討
其所習泛濫而無著非徒不得專一又使害主其中何

欽定四庫全書

太平御覽
卷二十七

十四

謂其然且羣書之中真偽相半亂聖人之微言者多背
大道之宗旨者非一若使習而成功得不揉淳粹之性蕩
中正之氣其為吏也安能分挈治柄使教令黜陟哉况
夫儒者之術不以廣記隱奧為博學不以善攻奇巧為
能文若使明行制令大立程式每至命題考試不必使
出于典章之外參以正史至于諸子之意必須輔于經
合于道者取之過此並斥而不用然後先策論後詩賦
責治道之大體捨聲病之小疵如是則使夫進士之流

知其所習之書簡而有限知其所學之文正而有要不
施禁防而非聖之書自委棄于世矣不加賞典而化成
之文自興行于世矣上覽而嘉之召試舍人院除右正
言

景德二年三月甲寅上親試禮部奏名舉人得進士李
迪以下二百四十六人第為五等

李迪李諮
劉滋王矩

上謂宰相

曰昨親閱考官所定試卷意其入下等太多即別加詳
考往往合格比緣入試多士糊名校覆在于公當而考

官不知朕意過抑等第欲自明絕私甚無謂也迪所試最優李誥亦有可觀聞其幼年母為父所棄在舅氏誥日夕號泣求還其母乃致絕暈茹禱祈又能刻苦為學自取名級亦可嘉也以迪為將作監丞誥及夏侯鱗為大理評事通判諸州進士第一等為試校書郎先是迪與賈邊皆有名塲屋及禮部奏名而二人皆不與考官取其文觀之迪賦落韻邊論當仁不讓于師文義與注疏異特奏令就御試叅政王旦議落韻者失于詳審捨

注疏而立異論輒不可許恐士子從今放蕩無所準的
遂取迪而捨邊當時朝論大率如此夏四月樞密直學
士劉師道責授忠武行軍司馬知制誥陳堯叟單州團
練副使先是師道弟正道舉進士禮部奏名將廷試近
制糊名考校堯叟為考官教正道于卷中密為私號正
道既上第或告其事詔落名永不預奏庚申上親試士
百人得進士范昭等五十一人餘賜出身特奏名進士
李正辭論文武先後以為文者本乎靜武者本乎動動以

止亂而至乎靜則先後可知上嘉其近理將擢上第會有言嘗犯杖遂補三班奉職撫州進士晏殊年十四大名府進士姜益年十二皆以俊秀聞乃召試殊試詩賦各一首益試詩六首殊行文敏甚上乃歎賞宰相寇準以殊江左人欲抑之而進益上曰朝廷取士惟才是求四海一家豈限遐邇邇如張九齡何嘗以僻陋棄乃賜殊進士出身益同學究出身後一日復召殊試詩賦殊言賦嘗所私習上益愛其淳直改試他題既成上曰善擢

秘書省正字秘閣讀書翰林學士晁迥等上考進士新
格詔頒行之初陳彭年以進士輕俊喜謗主司宋白知
貢舉惡其為人黜落之彭年憾然于是更定條制多意
白舊事而設關防所取不復揀擇文行止校一日之藝
雖杜絕請託然寘甲等者或非人望自彭年始也

大中祥符元年夏上親試進士命李宗諤等八人為考
官諭宗諤等務在精詳勿遺賢俊賜進士姚暉等及第
先是謝恩方令釋褐是日特賜綠袍靴笏以暉等三人

為將作監丞大理寺評事過判諸州四五為兩使推官
六人以下為試銜知縣餘為簿尉

姚曄祖士衡
鄭向杜衍

先是監察

御史張士遜為貢院監門官時貢舉初用糊名之法士
遜白主司有親戚在進士中明日當引試願出以避嫌
主司不答士遜乃自言引去上是之記名於御屏乃詔
自今舉人典試官有親嫌者皆移試別項

二年六月上御崇政殿服勤詞學經明行修人第為五
等賜進士梁固等及第固灝之子也以灝遺蔭賜進士

出身服除詣登聞讓前命願赴鄉舉從之

四年十二月先是汾陰赦書舉服勤詞學經明行修之士如東封例惟不重考丙子上御殿親試進士叩殿檻請示詩賦論題所出上令錄示之方令試賦論中不得用小臣儒有字又以冬日景短罷常務不決即令引試內新定條制舉人內試卷內臣收之先付編排官去其鄉貫狀以字號第之付彌封繕錄校勘用御書印方付考官定等訖又封彌送覆考官再定編排官閱其同異

未同者再考之如復不同即以相近為定始取鄉貫狀
字號合之乃第其姓名差次并試卷以聞遂臨軒唱第

賜進士

張師德丁
度程琳等

三十一人及第汾陰路多上文章庾

辰詔以約州叅軍許洞推官解旦等九人姓名附中書
言旦及進士范本陳矩詞學可采授著作佐郎本賜及
第矩賜出身

五年壬子上謂宰相曰聞貢院試諸科舉人皆解衣閱
視慮其挾藏書冊有失取士之體宜令正之先是直史

館劉鍇請依本并同保人殿一舉是歲諸科以挾書扶
出者十八人并同保九十三人而十二人當奏名有司
以聞上特令赴殿試乃詔禮部別加裁定罷同保殿舉
之制詔錄諸州軍試題進內上將試進士慮其重複故
自是用為常例己丑上親試禮部合格貢舉人殿之廊
宇分列位次署其名氏仍揭于榜使不得遷易始模印
試題以賜官給紙起草得進士

徐爽明錦徐果
王咨孔道張演

一百二

十六人五月戊辰詔禮部權止今年貢舉

七年秋丙子詔自今差發解知舉等授勅訖即令閤門祇候一人引送鍊宿不得與僚友交言違者閤門彈奏如所乘馬未至即以廐馬給之因王曾受詔與試舉與學士李維偶語閤門使魏昭亮意曾受維請託奏之因有是詔曾以妻臨產屬維以家事上御景福殿試亳州南京路服勤詞學經明行修舉人得進士林宥張觀等二十二人賜及第除官如西封例上謂宰相曰近年舉人文藝頗精孤貧得路然為主司亦大有不易徇請求則害公絕薦

託則獲謗王旦曰今郡縣至廣人數亦多必須臨軒親試至于南省解發亦朝廷特為主張則雖貴戚主司亦難以集事

八年六月以童子蔡伯希為秘書省正字其父龜從為校書郎以龜從善于教子召試中書而命之伯希四歲誦詩百餘篇初開封府解服勤詞學進士二十人為下第者劉溉所訟其十三人以寓貫皆奔竄潛匿有司追捕王旦奏曰陛下比降恩詔搜羅才俊今反變為囚繫

有傷風教且科舉之設本待賢德此輩操行如此望特
出宸斷以懲薄俗上曰此蓋當時不曾曉諭致此過誤
其寓貫者當並釋罪漑付外州拘管既而御史高弁上
言漑訟事得實被責太過上以問旦旦曰漑訟未必非
必據款乃俟其得解則訟縉紳之姦賊朝廷黜其無行
諫官所宜樂聞弁妄形奏對由是言之向非聖斷明哲
辨舉子誤犯則須連坐府縣御史糾彈甚無取也上覽
諸道貢舉之人減于常年因曰外郡官吏未體朕心比

者詔累下但戒其徇私爾若能精擇寒俊雖多何害是
歲方置謄錄院令封彌印官封印所試卷付之集書吏
錄諸司供帳內內侍二人監焉命京官校正用兩京奉
使印訖復送印院始送知考官考校丙子詔禮部貢院
進士六舉諸科凡舉以上有不合格並許奏名戊戌趙
安仁上合格之人姓名上謂宰相曰今歲舉場似少謗
議安仁等乃對朕亦以此語之矣王旦曰條式備具可
守而行至公無私其實由此癸卯上御殿覆試多所黜

落又疑所加抹者未當命宰相閱視之旦曰考官過為

艱難公在其中矣于是得進士

蔡齊王舉正等

四十九人乙卯

科

龐籍范仲淹李若谷等

三百八十人餘諸科並賜及第同出身

除官如元年之制齊等考定上顧問王旦等曰有知姓

名者否皆曰人無知者真所謂搜求寒俊也故事當賜

第一新喻人蕭貫與齊並見齊儀狀秀偉舉止端重上

意已屬之知樞密院寇準又言南方下國人不宜冠多

士齊乃居第一上喜謂準曰得人矣特詔金吾給士騶

出兩節傳呼因以為例準性自矜尤惡南人輕巧既出
謂同列曰又與中原奪得一狀元齊膠西人四月賜進
士楊偉及第賈昌朝同出身大禮之初貢舉人呈詩頌
者甚衆近臣詳考惟偉及昌期可采故召試學士院而
命之

天禧元年冬前江州瑞昌縣主簿劉若冲進所業命試
舍人院以策論稍優特加兩資先是若冲建議自今召
試者並請試策至是用其議而命之

二年秋詔自今試瑣廳舉人所在長吏先考藝業合格即得取解如至禮部不及格當停見任其前後舉送長吏並重寘其罪

三年三月翰林學士錢惟演等四人同知貢舉諸路貢舉人郭稹等見于崇政殿稹冒總喪殿三舉同保並殿一舉時有司欲脫王洙問洙曰果保稹否不然可易也洙曰保之不願易也乃與稹俱罷

三月上親試禮部奏名貢舉人作詩賜校官令皇子

書示宰相得進士王整以下及第

程戡常禹
錫孫堪

除官如前

例

乾道元年夏壬寅以光祿寺丞尉氏馬季良家本茶商
劉美女婿也于是召試館職太后遣內侍賜食促令早
了主試者分為作之

仁宗科舉取士

天聖二年春正月甲午詔禮部貢院開封府國子監及
別頭各增置點檢試卷封彌巡鋪監門官有差癸卯命

御史劉筠等同知貢舉二月乙丑上謂王欽若曰久罷
貢舉慮遺天下賢士宜令禮部貢院精加校試將來放
進士特增置二百人諸科三百五十人三月禮部上合
格進士姓名詔翰林晏殊學士馮元編排等第乙巳賜
宋郊葉清臣鄭戩等及第郊與弟祁俱以辭賦得名禮
部奏祁名第三太后不欲弟兄乃推郊第一祁第十
劉筠得清臣所對策擢第二國朝以策擢高第自清臣
始夏四月庚辰以特奏名進士李道宗等諸科王播等

為將作監主簿及諸州長史文學參軍道宗等皆年止
五十常應六舉王播年止六十常應八舉上因謂大臣
曰此雖舉業非工然閱其白首無成故甄錄之第一甲
葉清臣鄭戡高若

二甲

余靖宋成尹洙胡宿

第一人為通判德車

結旌賦

采侯詩

三年八月辛亥知益州薛田言本州解發舉人自張詠
以來例給館券至京師今得三司移文以責吏人償所
給官物恐非朝廷之意上曰漢貢士皆郡國續食今獨

不能行之遠方耶其令悉免之

四年五月己卯詔禮部貢舉人實應三舉諸科五舉並免取解詔增西川廣南東西路諸州軍進士解額有差又詔命官鎖廳應舉自今更不試所業乙第者免責罰古制先於所屬選官考試所業方聽取解至禮部程文不工勒停不及格贖罰至是上欲開誘進士之路近臣叅定而降是詔

下第免責景祐元年四月又有詔蓋此專指下第者彼又及不得解者冬

十月乙酉詔進士諸科曾經先朝御試而今不預薦者

許就省試

五年春己未詔禮部貢院比進士以詩賦定去留學者
或廣聲律而不得騁其才其以策論兼考之諸科毋得
離析經注以辨問因辛酉御崇政殿試禮部奏名進士
仍命翰林學士宋綬以下三十六人為封彌謄錄考覆
詳定編排官如舊制乙丑賜進士王堯臣等及第三百三
十七人

韓琦趙鼎包拯吳育陳舉亮文彥博二甲劉觀
王翼聖有謨烈賦南風之薰詩執政如金玉論

夏癸酉試特奏名及諸科賜同出身尋下詔戒諭諸道

舉人宜奮勵文學毋坐視日月以望恩澤

七年閏五月己未朔詔禮部貢舉庚申詔曰朕試天下之士以言觀其趨向而比來流風之弊至於附會小說礫裂前言競為浮夸靡曼之文無益治道非所以望於諸生也禮部其申飭學者以明先王之道有合朕意焉

八年春丙寅命資政殿學士晏殊同知禮部貢舉三月御崇政殿親試進士王拱辰等二百四十九人並賜及第

劉沆孫材蔡襄田況石介歐陽修二甲
田師錫元絳劉元俞孫甫唐介尹原

上三名並簽判

八月學士晏殊言唐明經並試策問參其所習以校材
識今專取記誦請終試策一篇詔近臣議可否咸以諸
科非素習議乃止

明道二年秋七月乙亥詔諸州自今考試舉人並封彌
卷首仍委運司于所部求才學若公勤者為考試監門
封彌官冬十月上諭內臣曰近歲進士所習詩賦多浮
華而學古者或不得以自進宜令有司兼以策論取之
景祐元年春詔曰朕念天下士鄉學益繁而取人之路

尚袂或匿迹田里白首而不得進其令南省就試進士
諸科十取其二進士五舉年五十諸科六舉年六十常
經殿試進士三舉諸科五舉預先朝御試試不合格句
輒黜皆以名聞自此率以為常三月戊寅試禮部奏名

進士張唐卿以下並賜及第

張唐卿楊察石詢有吳秘
林槩張來楊靖蔡挺蘇舜

欽柳二友石亞之石元
之葉適柳三接劉安世

四年春甲寅詔禮部貢院自今年三月一日申請貢舉
其舉人到省以十一月十五為限先是賈昌朝言舉人有

親戚仕在本州及侍父祖遠官本州二千里宜敕運司
選官類試以十率之取三人詔兩制議丁度言貢舉古
制以五月一日申請十月二十五日上召于省若二千
里移試不及願稍寬其期一如昌朝說故降是詔自是
諸路始有別頭試六月丙申詔開封及國子監及別頭
試自今彌封謄錄如禮部左司諫韓琦之請也十月己
未章得象言開封進士章仲昌臣鄉里疎屬冥無藝業
近聞訟訴發解不公事請牒歸其家從之時鑠廳應舉

人特多開封投牒者百十國子監及諸州不在及出榜宰相陳堯佐之子博古為解元參政韓億子孫四人無落者故嘲謗羣起然殿中侍御史蕭定基直集賢院韓琦吳育王拱辰實司試事非有所私也

寶元元年春試禮部奏名進士三百十人及第賜諸科四百十四人及第并出身特奏名被恩賜者又九百八

十四人瓊林晏初試太學篇

呂臻祖無擇石楊伏王屏司馬光呂大臨范鎮呂晦

吳中伏吳充陳執中

先是上以開封所解進士陳博古等嘲謗籍

籍詔博古并韓億四子并兩家門下士范鎮家靜試卷
皆勿考鎮成都靜眉山人考官奏請鎮固有文久馳名
場屋非附兩家之勢而乃得聽考而降其等級鎮禮部
奏名為第一故事第一人賜第未有第二甲者雖近下
猶升之吳育歐陽脩殿庭唱第上三人亦抗聲自陳鎮乃
默然至第七十九人乃拜出退就列無一言衆以是賢
之禮部第一人在第二甲自鎮始初薛奎知益州還朝
與鎮俱或問奎入蜀所得奎曰得一偉人當以文字名

世

二年十一月壬辰詔禮部自今詩賦論題並以注疏所
解揭示之不許上請或題目有疑當請者仍不得近簾
閨十一月鎖廳別試

慶歷二年丁巳命翰林聶冠卿權知貢舉初學士李淑
侍經筵詢以進士詩賦策論先後俾以故事對淑退而
奏曰唐調露二年劉思立為考功員外以進士止試策
減裂不見其學請帖經以觀其學試雜文以觀其材自

此沿以為常至永隆二年進士試雜文通文律者始試策
天寶十一年進士試一大經能通試文賦又通而後試策
五條皆通為中等第建中二年趙贊試以時務策五首
箴論表贊各一首以代詩賦太和二年試帖經畧問大義
取精通者次試論議各一首八年禮部試以帖經口義
次試策五道問經義者三問時務者二自後變易而以
詩賦第一場論二場策三場帖經第四場今陛下欲求
理道不以雕篆為貴得取士之方矣然考官以所試分

考不能通加評較而每場有退落士之中否係於幸不幸耳願約古制先策次論次賦次帖經墨義而敕有司并試四場通較工拙毋以一場得失為去留詔有司議稍施行焉一日知制誥富弼言國家沿隋唐取士之制景德來為法尤密言省試有三長殿試有三短不容私詩賦策論才能可見兩月餘研究泛取不擇三篇不能盡人考究不服乃罷十月又言殿試始于武后不足法辛巳詔罷殿試翰林王堯臣同修起居注梁適皆以祖

宗故事不可遽廢越三日詔殿試如初三月賜進士楊
寘等三百三十七人及第寘登第初試國子監禮部皆

第一及是帝臨軒啓封見姓名喜動于色謂大臣曰楊

寘也公卿相賀為得人授將作監丞通判潁州

楊寘韓絳王珪

陳洙王安石呂公著
蘇頌傅堯俞呂夏卿

三年八月擢任范仲淹責以太

平仲淹條奏十事三曰精貢舉畧曰外郡發解進士本

鄉舉里選之式必先考其履行然後取以藝業今乃不

求履行惟以詞藻墨義取之加用彌封不見名姓大非

里選之本意也又南省考試舉人一場試詩賦一場試策人皆精意盡其所能復考較日久實出舛謬及御試之日詩賦文論共為二場既聲病所拘意思不遠或音韻中一字有差生平苦率即時擯逐如音韻不失有末學淺近俯拾科第既鄉舉之處不考履行御試之日更拘聲病以此士人進退多言命運而不言行業明君在上固當使人以行業進乃言命運者是善惡不分而歸于天也豈國家之美事哉臣請重定外郡發解條約須

是履行無惡藝業及等者方得解薦更不封彌試卷南省考試之人已經本鄉詢考履行更須封彌試卷藝業定奪高下訖入進御前選官覆考重定高下訖然後開看明年施行南省所定高下內高下合同姓名偶有高下更不移改若等不同人數必少却加封彌更宜兩地參較然後御前放榜此為至當內三人以上即于高等人中選擇聖意宣放其考校進士以策論高詞賦次者為優等策論平詞賦優者為次等諸科經旨通者為優等

墨義通者為次等已上進士諸科並以優等及第者放
選注官次等及第者守本科選限自唐以來及第人皆
守選限國家以收復諸國郡邑之人其新及第人權與
放選注官今來選人壅塞宜有改革又足以勸學使知
聖人治身之道則國家得人百姓受賜

四年春范仲淹等意欲復古勸學常言興學校本行實
詔近臣議于是翰林宋祁御史王拱辰知制誥張方平
歐陽修侍御史梅摯侍講曾公亮王洙右正言孫甫監

察御史劉湜

此乃李清臣史藁

合奏曰伏奉詔有曰取士當求

其實用人當盡其才今教不本于學校士不察于鄉里則不能覈名實有司束以聲病學者專于記誦則不足盡人才此乃議者所共為言也謹參考衆說取其便于今者莫若使士皆土著而教之於學校然後州縣察其履行則學者修飭矣故為設立學舍保薦舉送之法夫上之所好下之所向今先策論則文詞者留心于治亂簡程式則閎博者得以馳騁矣取大義則執經者不專于

記誦矣其詩賦之未能肄者雜用今體經術之未能亟通者尚如舊科則中常之人皆可勉及矣此所以盡人之才者也故為先策論過落用詩賦考式問諸科大義之法此數者其大要也其州縣封彌謄錄進士諸科帖經之類皆苛細而無益一切罷之法行則申之以賞罰如此養士有本取才不乏為治之本也乙亥詔曰儒者通天地人之理明古今治亂之原可謂博矣然學者不得騁其說而有司務先聲病章句以拘牽之則吾豪俊奇

偉之士何以奮焉士有純明茂材之美而無文學作成之法其飭身立節者使與不肖之人雜而並進則無文德敏行之才可以見焉此取士之甚弊而學者自以為患亦嘗屢以為言比今詳酌仍令政事府參定皆謂本學校以教之然後可求其行實先策論則辦理者得盡其說簡程式則閎博者可見其才至于經術之家稍增新制兼行古法以勉中人煩法細文一皆罷去明其賞罰俾各勸焉如此則待人之意周取人之意大夫遇人

以薄者不可責其厚也今朕建學興善以尊士大夫之行而更制草弊以盡學者之才教育之方勤亦至矣有司其務嚴訓導精察舉以稱朕意學者其進德修業不失其時凡所科條可為永式其令曰州若縣皆立學本道使者以屬部官為教授三年而代選于吏員不定取于鄉里宿業有道德者三年無私遣以名聞士須在學習業三百日乃聽預秋試舊常充試者百日而止親老無嫌特取保任聽學于家而令試于州者相保任所禁

有七曰隱憂匿服曰嘗犯刑責曰行虧孝弟有狀可指
曰明觸憲法而經贖罰或不經贖罰而為害鄉黨曰籍
非本土假戶冒名曰祖父犯十惡四等以上罪曰工商
襍類或嘗為僧道皆不得預進士試三場先策次論次
詩通考為去取而罷帖經墨義又以舊制用詞賦聲病
偶切立為考式一字違忤已在絀落使博識之士臨文
拘忌俯就規檢美文善意鬱而不伸如白居易性習相
近遠賦獨孤綬放馴象賦皆當時試禮部對偶之外自

有意義可觀宜詳倣唐體使馳騁于其間士子通經術
願對大義者試十道以曉析意義為通五通為中格三
史料取其明史意而文理可采者明法科試斷案假立
甲乙罪合律令如法意文理優為上等

五年此即仲淹十事之三也丙子詔禮部貢院增天下
解額總諸州軍凡增三百五十九人詔遂為定額

慶厯六年賜進士五百四十四人出身

賈黯謝仲弓田
育王存趙瞻孫

國熊
本

皇祐元年三月進士馮京以下四百九十八人

馮京沈遘以

有官不得為第一遂降次名錢公輔李育文同毛國華吳申呂大防范百祿孫幾

蓋軫象天地

賦日是不暇食詩天聽君人之言論二年十一月詔自今諸省元得申奏及遣念書童子赴闕

寶元元年六月戊寅罷天下舉念書童子可考

五年三月辛酉賜進士鄭獬等五百二十人及第二百

人出身一百五十人同出身

獬安陸人也楊繪圖丘象天賦律聽軍聲詩樂與人

心論滕甫楊美蒲宗孟李無黨李清臣呂陶李定蒲宗閔楊古客錢藻

秋戊子詔禮部貢

院自今諸科舉人並以四通為合格凡經止問大義不須注疏全備其九經場數並各減一場仍不問兼經又詔試官親嫌令府監互相送若兩處俱有親嫌即送別頭

嘉祐二年春正月翰林學士歐陽修權知貢舉先是進士益相習為奇僻鉤章棘句寢失渾厚修深疾之遂痛加裁抑乃嚴禁挾書者及試榜出時所推譽皆不在選器薄之士候修晨朝羣聚呵斥之至街司邏吏不能止

或為祭歐陽修文投其家卒不能求其主名置于法然
文體自是亦少變

丁亥賜進士章衡等二百六十三人及第一百二十六
人同出身是歲進士與殿試者始皆不落

李復圭紀聞云是春以進

士辱歐陽修之故殿試及第不落一人當考民監賦鸞
刀詩重吳申命論章衡竇卞鄭雍呂惠卿蔣之奇蘇軾
曾肇朱光庭曾布宋希史元道王韶梁燾蘇惟賢蘇轍劉元喻十二月先是上封者言

四年一貢舉四方士子客京師以待試者六七千人一
有喧噪其徒衆多勢莫之禁且中下之士往往廢學數

年才學之士不幸有故一不聽詔沉淪十數年或累舉
滯晉遂至困窮老死者甚衆以此毀行冒法干進者不
可勝數宜間歲一貢中分舊數而薦之王洙侍講周禮
至三年大比大考州里以贊鄉大夫廢興帝曰古者選
士如此今經四五歲一下詔故士有抑而不得進者為
今之計孰若裁其數而屢舉下有司議乃合奏曰間歲
之法無害有利不足疑戊申自今間歲貢舉進士諸科
悉解舊額之半進士增試時務三條諸科增試大義十

條又別置明經科其試法凡明兩經或三經五經者各問墨義大義十條兩經通八三經通六五經通五為合格兼問論語孝經十條分八場出身與進士等以禮記春秋左氏傳為大經毛詩周禮儀禮為中經周易尚書穀梁傳公羊傳為小經其習禮記為大經者許以周禮儀禮為中經習春秋左傳者許以穀梁傳公羊傳為小經舊制說書舉合罷之其不還鄉里而寓戶他州以應選者嚴其法每秋試自縣令佐奏行義保任之上于州

長貳復審察得實然後上本道使者類式已保任而後有缺行則州縣皆坐罪若省試而文紕謬坐元考官又用孫抃奏諸州解試額多而中程少不必足額

八年夏詔科場舊條皆先朝所定宜一切無易時禮部貢院言四年宋祁等定貢舉新制會明年詔下且聽須後舉施行今秋試有期緣新制諸州軍發解但令本處官屬保明行實其封彌謄錄一切罷竊見外解送舉人自未封彌謄錄以前多采虛譽苟試官別無請託亦先

取本州曾經薦送舊人其新人百不取一封彌以後考官不見姓名即須實考文藝稍合至公又新制進士先試策三道次試論次試詩賦先考策論定去留然後與詩賦通定高下然舉人每至尚書省不下五七千人及臨軒覆較止及數百人蓋詩賦以聲病雜犯易去留若專取策論必難升黜蓋詩賦雖名小巧且須題命事若記問該富則辭理自精策論雖有問題其間敷對多挾他說對不及五通盡黜之即與原定解額不敷若精麗

畢收則濫進殊廣所以自祖宗以來未能猝更其制兼
聞舉人經史疑義可以出策論題目凡四十條謂之經
史質疑至于時務亦抄撮其要浮偽滋甚若為考試又
舊制以詞賦聲病剽切之類立為考式今特許倣唐人
賦體及賦不限聯數不限字數且古今文章務先體要
古未必悉是今未必悉非常規唐人體式詩賦與本朝
所取名人辭藝亦工拙相半俗儒是古非今不為通論
自三朝以來國子監生詩賦即以汗漫無體為高策論

即以激訐肆意為工中外相傳愈遠愈濫非惟漸誤後來省試其合格能幾何人伏以祖宗以來得人不少考較文藝固有規程不須變更以長浮薄請如舊制故降是詔五年三月己卯下詔貢院所試詩賦經又並如舊制本志以為楊察建是議而實錄但上封者言新制不便不出主名八年四月丙子又下詔乃其貢院申請即本志所書楊察初議弘按察權判貢院初建此議當五年三月既已施行八年四月貢院復有申請其議則實

察五月所建者但不知此時察仍判貢院或已罷爾今
兩存之仍于此年依實錄不出察主名本志又于此詔
後書張方平知舉請下詔辭賦新體拔方平以六年二
月知貢本志誤矣初詔外州發解到省差官覆考蓋慮
因此或致折退寒士故也

四年五月進士一百六十五人

堯舜性之賦求遺書于天下詩易簡得天心之

理論劉揮胡宗愈安
燾劉摯章惇蔡確

二月庚寅詔禮部貢院曾經御試

五舉諸科六舉進士省試六舉諸科七舉年五十以上者

具以名聞

六年四月進士一百八十三人

士者通天地人賦天德清明詩水幾于道論王

俊民黃履劉奉世賈易江術孔文仲韓忠彥王安禮張燾

八年三月賜進士許將等

一百二十七人及第六人同出身諸科二百四十七人

及第同出身

許將范祖禹孔武仲沈括呂陶

治平元年五月己巳禮部

奏鄉貢進士李加言等伯父為道士而死請比外繼降

服大功九月許其應舉天聖七年置武舉皇祐元年詔

罷之嘉祐八年密院奏以為文武二選所關治亂不可

闕一與其任用不學無術之人臨時不知應變以撓師
律不若素習韜畧頗閑義訓之事緩急驅策可以折衝
況今朝廷所用人稍有聲稱多由武舉而得則此舉不
可廢明矣即詔兩制詳議所集舉業及較試取中推恩
之數兩制議請隨進士等科開設許在京管軍及正在
橫行使副知雜及三院御史諫官并轉運判官提刑三
路知軍州及路分總管鈐轄各奏舉一人試及武藝優
者與殿直次三班奉職殿直三班差使策不中而武藝

絕倫者取旨學士賈黯又奏請如明經之制于太公韜
畧孫吳司馬諸兵法及經史言兵事者設為問目能用
己意或引前人注釋辭理明暢及因所問自陳方畧可
施行者為通從之而令每開舉則兵部至歲中具所舉
人名數以聞明年三月命館職兩人與判兵部同試策
一道命馬軍司試弓馬武藝具所試等籍送試官叅校
合格以名聞至八月則命官與判兵部同試策于秘閣
命直學士以上及正任或橫行使一人與軍頭司試弓

馬武藝以所試等第籍送秘閣試官參考合格者以名

聞九月丁卯遂詔復置武學

蓋嘉祐八年始議治平元年九月議定乃降詔其降

詔因緣密院建請非治平元年九月方建請也

英宗

治平二年二月賜進士彭汝礪等三百六十一人及第

出身汝礪等三人授初等幕職官如咸平年例

彭汝礪章榘張

商英舒亶孔平仲孫漸

四年進士三百五十人四等自此三歲一

舉

許安世宋級那思黃庭堅

司馬光權知貢舉三年冬十月丁亥詔

曰先帝以士久不貢則怠于學而豪傑者不進故下間
歲之令冀以得人而自更法以來其弊浸長何則里選
之牒仍故而郡國之取減半計偕之籍屢上而道途之
勞良苦朕甚閔焉其令禮部三歲一貢舉天下解額于
未行間歲之法紀前率四分取三分禮部奏名進士以
三百為額明經諸科不得過進士之數舉志云自是恩
典不增而貢舉
緩士得休息官以
不煩矣今前去權知貢舉司馬光上言所考試合格
進士許安世以下三百五人分四等明經諸科二百一

十一人三等詔進士第一第二第三等賜同出身明經
諸科第一第二第三人並為防禦團練推官其餘注官
守選如例

神宗

熙寧三年知貢舉王珪上合格進士陸佃等先是知貢
舉呂公著在貢院中密上言天子臨軒策士而用詩賦
非舉賢求治意乞出自宸衷以諮訪治道己亥上御集
英殿進士初就席有司猶給禮部韻及試題出乃策問

也上顧輔臣曰對策亦何以盡人才然愈於用詩賦取

人爾既而遂賜葉祖洽

司馬光目錄曰時韓維呂惠卿初考附者皆在高等言直者多

在下等宋敏求劉攽覆考及之吳充陳襄從初考祖洽考祖宗多因循苟且之政建隆下革而新之初考為三等中允等奏泛與者呂公澤蘇軾編排上官均第一祖洽二佃第五程堯佐奏名第三以陸佃知新法故易第二為第五焉是歲進士二人直詆時病皆在下開封范越一不知名

四年二月丁巳朔頒學校貢舉新制先是王安石謂更學校貢舉之法詔兩制三館議之司馬光時為翰林學士即應詔上議直史館蘇軾亦議曰准敕講求學校貢

舉利害令臣等各具議狀聞奏者右臣伏以得人之道在于知人知人之法在于責實使君相有知人之明朝廷有責實之政則胥吏皂隸未嘗無人而況于學校貢舉乎雖因今之法臣以為有餘使君相無知人之明朝廷無責實之政則雖侍從常患無人況學校貢舉乎雖復古之制臣以為未足時有可否物有廢興方其所安雖暴君不能廢及其既厭雖聖人不能復故風俗之變法制隨之譬如江河之徙移順其所欲行而治之則易

為功強其所欲而復之則難為力使三代聖人復生于
今其選舉賢才亦必有道矣何必由學舊法行之百年
治亂興衰初不由此陛下視祖宗之世貢舉之法與今
為孰精言語文章與今為孰優所得文武長才與今為
孰多天下之士與今為孰辨較此四者短長之議決矣
今議者所欲變改不過數端或曰鄉舉德行而畧文章
或曰專取策論而罷詩賦或欲舉唐室故事兼採譽望
而罷封彌或欲罷經生樸學不用帖墨而考大義此數

者皆知其一不知其二者也臣願陛下明敕有司試之以法言取之以實學博通經術者雖才不廢稍涉浮誕者雖工必黜則風俗稍厚學術近正庶幾得忠實之士不至蹈衰季之風則天下幸甚議上上曰吾固疑此得蘇軾議意釋然矣然是卒除聲律專意經義罷明經及諸科立新制如安石請其新制曰中書言今貢舉新制進士罷詩賦各專治詩書易周禮禮記一經兼以論語孟子每試四場初本經次兼經并大義十道務通義

理不須盡用注疏次論一道次時務策取諸科解名增
解進士以熙寧二年解明經數為率如舉人數多于熙
寧二年即每十人更取諸科額一人諸科額不及三人
者聽依舊每二十人如十人法禮部奏名于諸科解額
取十分之三增進士額京東陝西河北河東京西進士
開封國子監諸路嘗應諸科改應是進士者別作一項
考校其諸科取到今數並充進士奏名將來科場諸科
宜令依舊應舉候經一次科場除舊人外不得應諸科

舉五路先置學官中書選擇逐路各三五人雖未仕有經術行誼者亦許權教授給下縣主簿尉俸願應舉者亦聽候滿三年有五人奏舉堂除本州判司主簿尉俸依舊兼授即經術行誼卓然為士人所推服者除官充教授其餘州軍並令兩制兩省館閣臺諫官僚屬薦舉見任京朝官選人有學行可為人師者中書體量堂除遂落官令兼本州教授諸州進士不及二百人處轉運司并鄰近三兩州考試仍各用本州解額殿試策一道

限十字以上分五等第一等第二等賜及第第三等第
四等同出身第五等同學究出身

六年正月知舉曾布上合格進士邵剛等己酉乃御集

英殿策試遂賜余中

李夷行陳唐管
師仁管師漸

等四百人及第出

身

是年罷詩賦賜
期集錢三十貫

九年三月辛酉御集英殿策試遂賜徐鐸以下四百三
十人及第出身綰第五請依舊賜進士出身無以同學
究恥之不從綰後再言卒從之初命綰知舉時專以經

取士前史興亡治亂之迹舉者莫得習綰於策問悉訪

史學至是奏進士張

閩

等合格號為得人事已綰入對

上曰卿以史學問矯學者可謂舉其偏矣

徐鐸李克非邵徇武楊洵

劉勃鄧洵
仁安律

元豐二年春丁亥詔以經義論試宗室二月辛未知舉

許將上合格進士朱浚明等庚辰御集英殿策試遂賜

時彥

陳瓘朱浚明晁補
之家彬張康國

等三百四十八人及第出身

是時免試刑法

五年二月知舉李清臣上合格進士劉槩等壬辰御集

英殿策試遂賜黃裳

劉案張馴李西美余深鄒浩三石解馮解程美楊晦禾楊庭傑等

五百九十人及第出身槩開封人裳劍浦人也裳初考下等上親擢為第一考官蘇頌等各罰金

八年丁亥三省言禮部貢院火試卷三分不收一分欲令禮部別鑠試從之三月兵部侍郎許將給事中兼侍講陸佃秘書省監孫覺並權知貢舉以遺火再試也夏四月己巳詔再試進士及諸科武舉人罷今年御試內應直赴殿試者以前舉省試等第名次編排在今來止

奏名之下不曾赴省試者即與正奏名進士同場別號
試策一道五月乙未禮部言貢院以合格進士鄭奕江
與劉正夫太史章犯高兗王諱駁放丙申太皇太后曰
此舉人亦未通知特與收錄蔡確曰法當黜以事初過
誤恕之足彰盛德乃聽例依附榜末詔科場推恩依治
平四年故事正奏名進士諸科吏部給優牒特奏名中
書給勅告優熙寧中悉罷今復之丙申賜劉達
徐處仁
謝良佐
白時中鄭居中薛昂丘常孫漸等五百七十五人並釋
劉洵仁王袞侯蒙劉正夫宋鼎

揭武舉進士並賜袍笏銀帶達隋州人

是年狀元本
焦蹈蹈卒

哲宗

元祐元年閏二月尚書省言禮部以掌貢舉為職伏見朝廷用經術試科蓋欲人知義理學探原本近歲以來承學者多聞見淺陋辭格卑弱其意在於治經者專守一家之畧去諸儒傳記之說為文者唯務解釋而不知聲律體要之學深虞人才不繼而適用之言從此遂熄欲乞朝廷于取士之法更裁之又禮部言乞置春秋博

士及進士專為一經又侍御史劉摯言伏見國朝以來
取士設科循用唐制進士所試詩賦論策行之百餘歲
號為得人熙寧初神宗皇帝崇尚儒術訓發義理以新
人才謂章句頗碎大道乃罷詩賦試以經義臣愚欲乞
試法復詩賦與經義兼用之進士第一場試經義第二
場試詩賦第三場論第四場策經義以觀其學詩賦以
觀其文論以觀其識策以觀其才前二場為去留後二
場為名次又言近制明法舉人試以律令刑統大義及

斷案謂之雜科明法登科者吏部將司法員闕先次差
注在進士及第人之上臣以為宜有更張欲乞雜科明
法並加論語孝經大義登科之額裁減其半及注官之
日並科依日資次所貴從事於法者稍不遠義而士之
流不失其分伏望聖慈裁酌如賜開允即乞今年降詔
並自元祐五年秋試為始詔禮部與兩省學士待制御
史臺國子司業集議聞奏所有將來科場俱依舊法施
行三月司馬光言伏覲朝廷科場制度奉聖旨令禮部

與兩省學士待御史臺國子監司業集議聞奏臣竊有所見不敢以不聞凡取士之道當以德行為先文學為後文學之中又當以經術為先辭采為後神宗皇帝悉罷詩賦及經學諸科專以經義論策試進士此乃革歷代之積弊復先王之令典蓋王安石不當以一家私學欲蓋掩先儒令天下學官講解及科場程式同己者取異己者黜又黜春秋而進孟子廢六藝而尊百家加之但考校文學不勉勵德行此其失也今國家大義科場

之法欲盡善美以臣所見莫若於先朝成法合明經進士為一科立周易尚書詩周禮儀禮禮記春秋孝經論語為九經令天下學官依注疏講說學士博觀諸家自擇短長各從所好春秋止用左傳其公羊穀梁陸淳等說並為諸家孟子止為諸子更不試大義應舉者聽自專習三經已上多少隨意皆須習孝經論語於家狀前坐習某經臣愚所見如此伏乞以臣所奏及禮部等官所議榜國子監門及徧下諸州有州學處榜學門令舉

人限一月內攷狀指定何法為善仰本州附遞以聞候
到京齊足更委其他執政看詳叅酌從長施行先是光
以奏藁示范純仁純仁答曰孟子恐不可輕猶黜六經
之春秋矣更乞裁度光欣納之左司諫王巖叟奏臣切
為庠序所以萃羣材而樂育之以定其志業發其名譽
優游舒徐以待科舉也不必科舉之外別開進舉之名
多岐以支離其心而激其爭端使利害得失日夕戰于
胸中損育德養道之悖意非所以篤教化育人才也臣愚

乞鑒已然之弊罷三舍法開先生弟子不相見之禁學士大夫以不疑講解之餘上以公私試第其高下如昔時自足以獎材氣而屬風聲使多士欣欣于從學則上庠而復有雍容樂易之美為四方矜式矣乞下禮部及司業博士共議右司諫蘇轍言臣伏見禮部會議科場欲復詩賦議上未決而左僕射司馬光言乞以九經取士及朝官以下保任舉人為經明行修之科至今多日二議並未施行臣切惟來年秋試自今以往歲月無幾

而議不時決傳聞四方者知朝廷有此異論無所適從不免疑惑懣亂臣欲乞先降指揮明言來年科場一切如舊但所對經義兼取注疏及諸家議論或出己見不專用王氏之學仍罷律義令天下舉人知有定論一意為學以待選試然後徐議元祐二年以後科舉式未為晚也從先建言者謂專用詩賦盡黜經義太學生改業者十四五監察御史上官均言義術以理為主詩賦以文為工以理者于言為實而所根者本以文者于言為

華而所逐者末先帝草去數百年之弊不為不難而議者不計本末乃欲襲前日詩賦之弊未見為得也願陛下詳審而聽行之又言請令學者各占三經習以論孟不必專用新義試策二道一問歷代一訪時務禁用釋典不得專據莊老比於專用詩賦使學者弊精神於無用之文得失固相遠矣章三上又為六說以闢言者其後詩賦與經義訖並用云詔每遇科舉詔下令文官升朝以上無贓罪及無私罪重者於應進士舉人不拘路

公係有服親各奏舉經明行修一名候將來發解及南省名內每人名下注經明行修字至殿試唱名各升一甲姓名如歷官後犯正入己贓及進犯名教者斷訖收坐舉主並依舉選人轉京官減一等先是司馬光言昨已有朝旨來年科場且依舊法施行竊聞近有聖旨其進士經義並兼用注疏及諸家之說仍罷律義先次施行臣竊思朝廷之意蓋為舉人經義之體專習王氏新學人務起而集之臣所乞置經明行修科者欲使舉人

趨向去科場敦尚行義不專取文學所以美教化厚風俗此于經義之體尤有切要宜使舉人預知欲乞亦降朝旨先次施行况與進士舊法兩不相妨從之十一月三省奏立經義詞賦兩科下議從之

元祐三年四月丁未詔制科之設舊矣自西漢之世始詔有司詳求俊茂親臨采問受其條對故天下魁偉絕特之才守經自重之士得以並進而讜言正論並以聞上自斯以來歷世用之逮乎祖宗以神聖文武繼繼承

承設六科之選策三道之正以網維天下賢俊百餘年
間號稱得人先皇帝興學校崇教術以作新人才變天
下之俗故科目之設有所未遑今天下之士多通于經
術而知所學矣宜復制策之科以求拔俗之才裨于治
道今復制賢良方正能直言極諫科自今年為始令尚
書侍郎兩省諫議大夫以上御史中丞學士待制各舉
一人不拘已仕未仕以學行俱優堪備策問者充仍具
辭業進餘依舊制十一月庚申三省奏檢會元祐元年

閏二月二十二日指揮將來科場且依舊法施行四月
十二日指揮仍罷律義六月十二日指揮將來科場程
式不得用字說並用古今諸儒之說或已見即不許引
用申韓釋氏之書考試官不得于老列莊子內出題舉
經明行修人京東京西河北陝西路各五人淮南江南
江東江西福建河東兩浙成都府路各四人荆湖南廣
東西梓州路各二人荆河北夔州利州路各一人委州
縣當職官同保狀任申監司監司再加考察依上項人

數聞奏仍于發解前牒報本州充本州解額赴省無其人則闕上件逐次朝旨並已施行外今欲依項下一考試進士分為四場第一場試本經義二道論語或孟子義一道第二場試律賦一首律詩一首第三場論一首第四場問子史時務策三道以四場通定去留高下一新科明法依舊試斷案三道刑統義五道添論語義二道孝經義一道分為五場仍俟元祐五年秋試施行其諸路舉到經明行修之人如省試不合格即未得黜落

別作一項奏取指揮從之三年二月監察御史趙挺之言貢舉用三經新義取人近十二年今聞外議以為蘇軾之文意在矯革若見引用新義決欲黜落請禮部貢院將舉人引用新義注疏文理通行考校詔送貢院照會又詔殿試經義詩賦並試策一道從挺之請也

呂公著家

傳云初公著在仁宗朝嘗請進士先策論神宗初又獻議以經術取士及知熙寧三年貢舉遂密告臨軒專用策試未幾公著以言青苗等事得罪去至是時廷試執政之以熙寧復策之初進士葉祖洽議識祖宗自後對策者訖前朝以阿當世因為策問可廢當復詩賦論三題公著曰天子臨軒發策延四方貢士詢以治道豈非

近古良法耶至于對者之是非邪
正則在考官去取爾乃復舊試策

三月丁巳御集英殿

試進士戊午試特奏及武舉進士庚申試諸科及特奏

名人癸亥試武舉進士射藝于崇政殿推恩補官十有

五人詔罷及考校祖宗免親試法

日錄云宗室自熙寧後稍知向學故科舉

之進士少寬乃分考以為別異始知勇向至是罷去

己巳賜進士李常寧劉壽章

援楊彭史愿史通范致虛費貢等二十四人及第一百

九十有六人出身一百八十有八人同出身內宗室子

湜為承務郎令翻為承奉郎諸科明經七十有三人各

賜本科及第出身同出身有差庚午賜特進奏名進士
經明行修王鄰臣等同五經三禮學究出身假承務郎
京府助教諸州文學助教右班殿直三班奉職借職差
使凡五百三十有二人甲戌增新釋褐進士錢百萬酒
三百壺為期集費六月庚辰詔將來一次科場如有未
習詩賦舉人許依舊法取應解發合格人不得過解額
三分之一一應解二人者均取即有零分及解額一人
者並通取文理優長之人十月傳堯俞等准元祐三年

九月九日敕中書省臣僚上言將來殿試宜即用祖宗試三題之法并乞賜論語中外之士九月九日三省同奉聖旨令尚書侍郎學士待制兩省御史臺官國子監長貳疾速詳議聞奏臣等伏以天子親策貢舉自漢以來未之有改唐之進士雖試詩賦然惟有司奏行而已國朝開寶六年太祖始召進士親試於廷當時公卿不知建明易以策問而唯詩賦之用因沿著令莫之能改神宗皇帝以為非天子臨軒所以延見貢士詢求治道

之體熙寧三年始改策迄於元豐五年賜策問臣等以
謂學校教諸生州郡發解禮部考貢今已悉用詩賦足
以審其辭所有御前進士宜一依先帝故事試策合于
體於古為允十一月中書舍人彭汝礪言臣准禮部牒奉
旨令兩省兩制同共看詳修立到考校詩賦并格式聞
奏臣伏念先皇帝受天明命悼道之鬱滯奮于獨斷初
用經術造士以草數百餘年之弊士知本且向方而議
者獨病辭章之不工欲踵隋唐之弊法狎玩經說蠹道

真學者疑之不知取士臣考于心驗于古參于今反覆曲折終未見其可臣愚以為今學校選舉宜一用元豐條約令經明行修賢良方正之科而稍加損益焉蓋亦庶幾矣如詩賦決當寢罷臣涉道淺陋不欲以偏辭獨見咈衆人之所同是否朝廷已行之法必未能改為更乞下學士大夫詳議可否以求其中庶幾是非好惡有所歸一閏十二月御史中丞李常侍御史盛陶殿中侍御史翟暨監察御史趙挺之王彭年言臣等近者累次

論奏乞以經義別為一科今與詩賦科並行均取者蓋以見行科場詔條將來一次科場如有未習詩賦舉人許依舊法取應解發合格人不得過解額三分之一以此觀之則是朝廷更無用經術設科取人之理止以舊人未習詩賦且于將來一次科場量以分數收取而欲陰消之故也臣等所以區區者非特為舊習經義舉人頓然失業為言且以上之好惡不可不謹以義理論之則以經術勸士為先聲律為後以教化言之則通經術

者為利博事聲律者為害大竊今聞太學生與四方之士觀望朝廷意旨皆不復治經旨凡于義理之書一皆斥而不談博士所講與其父兄之訓不復更及高遠羣居切磨惟以論聲韻調平側事屬對較比擬以輕巧靡麗為務此臣等所以慮道術日衰以就廢絕將復如唐末五代時學士智識淺陋此有志之士固多太息而流涕也臣等今采之輿議欲以經義詩賦各設為科一經義進士科欲試四場經義六道每經二道欲以易書詩

春秋禮記周禮內第一場各出題一道第二場各出題一道又許占對三經以古今注疏及已見所長文理通瞻者為合格不得如舊日止記誦一家之義第二場試經義五道每經一道共五道第三場試論一首第四場試策三道並問子史時務一詩賦進士科試四場第一場試詩賦各一首第二場試經義四道出題同第一場人許占對一經試本經三道論語孟子一道第三場試論一首第四場試策三道並問子史時務右伏望聖慈深

惟國家教化之大陶冶人物之重四海執經之士十八萬人仰候令之所向詔以臣等愚言付之有司如或不謬特降指揮不勝幸甚明年四月八日詔應進士不兼詩賦人許依舊法取應增治一經增減試一場常等此奏乞存留經義一科並行均取豈朝廷果嘗欲廢經義科乎

四年夏四月禮部言經義詩賦進士聽習一經第一場試本經義二道論語或孟子義一道第二場賦及律詩一首第三場論一首第四場子史時務策二道經義進

士並習兩經以詩禮記周禮左氏春秋為大經周易公羊穀梁儀禮為中經願習二大經者聽即不得偏占兩中經其治左氏春秋者不得以公羊穀梁為中經第一場試本經義三道論語義一道第二場試本經義三道孟子義一道餘如尚令並以四場通定高下去留不以人數多寡各取五分即令分額及元額解一人者聽取辭理優長之人從之

初八日并十九日新紀
戊午立試進士四場法

二年十一月

十二日已立四場法已未詔元祐二年以前諸科舉人

改應新科明年法聽取應外自今更不許致其獲冒應人仍增舊賞從禮部刑部請也十二月禮部言諸路申請貢舉敕經義兼試詩賦進士及經義進士解額各取立分切慮兩科者不齊拘定五分則似未盡乞行拘取看詳進士兩科試法不一舉人互有輕重難易之論兼試人數不定則解額難以均當終非通法不可久行詔來年科場以試畢舉人分數均取後一次科場其不兼試詩賦人解額並依元祐三年六月五日所降朝旨如

未習詩賦人許依舊法取應合格人不得過額十分之一已後並依元祐二年十二月十一日敕命考試進士分為四場試本經義二道論語或孟子義一道第二場試律賦一首律詩一首第三場試論一首第四場問子史時務策三道以四場通定去留高下內仍減時務策一道五年十一月右正言劉唐老言請治經舉人以大義定去留詞賦而兼經義者以詩賦定去留並以策論定高下仍依舊分經考從之殿中侍御史上官均言自

祖宗以來固欲兼用詩賦未聞專以詩賦去留也而言者以為治平以前詞賦取士則去留主以詞賦熙寧以後經術取士則去留主以經術又以為元不分輕重考校故當時定四場取之制不亦過歟言者以為主司已自有四場通定之文所主不一各隨習尚互為升黜臣以為學者所習各有所長四場程文各有優劣惟所主不一取其優長故無遺才雖各隨習尚互為升黜又何害耶今就專以詞賦去取若賦不合格則經義策論雖精深

閱贍不可複取如此則博學能文之士所失多矣伏望
依元祐二年條制以四場通定去留高下庶幾無失人
之弊六年春正月己巳翰林學士知制誥兼侍講范百
祿權知貢舉詔五路進士及諸科明法人就試終場零
分不滿十人許解一人仍取文理優長以尚書省言通
判軍等處將終場十人以下零數添解一人不應元祐
貢舉故有是詔己巳集英殿試禮部奏名進士庚午策
試正奏名進士及武舉壬申試明經諸科律科并諸科

特奏名人壬午御集英殿賜進士諸科馮涓以下及第

出身同出身假承務郎文學等

馮涓朱紱張庭堅吳時蒲于之孫曾楊綰蘇迪

孫迪孫漸杜湛施訪
侯剛李稅劉千之

總六百有二人涓閭中人也癸未

賜特奏名進士諸科劉泌以下同出身假承務郎京府

助教文學州助教三百二十二人武舉進士賈君文等

三十三人乙酉延和殿太皇太后宣諭曰今歲御試考

校定後兩日方唱名于內中大禁非便其令自今後具

考試次第旋定唱名日壬寅給事中范祖禹言左諫議

大夫鄭雍奏貢舉條程文經義每道不得過五百字策
不過二分雖合格並降一等今辭旨優長者往往過數
用舊制自發解至御試文字並不以過數為限廣收閱
博之儒以副詔科之意今禮部詳定聞奏竊謂對策不當
立限衆所共知理無可疑不必更令禮部詳定乞並用
舊制詔今後對策過二分更不降等惟經依前降指揮
祖禹又封還以為不可其後卒亦不能行也七年夏四
月甲寅左正言姚勔言先帝表章聖學一用經行取士

欲以大道於變斯文然議者以為師用一家之說習以成弊不能貫通是以前日明詔復用詩賦此固陛下開廣育材之路求賢取士之深意也然臣切見舉士自復詩賦以來于今五六年頗未能工者就詢其由來良亦有說蓋今貢舉之法習詩賦者仍試經義既學者期于必得則務咨兼通至有司責其俱優則必無盡善若用意散漫則俱不精倘能偏及必有一短臣欲望朝廷並以詩賦經義各為一科隨所試人數多少均為取士之

格如此則永遠可行而學者專精一藝易見成就惟陛下裁擇又云四月二日敕臣寮上言近覩科場限制字條制不便再具論列乞今後賦論策經義並不限字數今已得旨策過二分更不降等而賦論經義未蒙指揮臣之愚以謂朝廷以言取士而禁其多言未應古義且非聖朝取士之良法往時開封舉人路授倡受長賦幾千言但為浮辭不求典要當時能文者往往效之得張方平擯斥其文遂正嘉祐初劉知幾輩喜為怪僻句得歐

陽修革去而其風復雅但係主司之風化耳今朝廷立法不問其文之澆淳而校其字之多寡責其不及猶有勸懲禁其多文殊無義理伏望朝廷更賜詳酌詔詩賦論二分並不降等其經義文理優長者准此五月癸巳詔秘閣試制科論題于九經兼正史孟子楊子荀子國語并注內出其正義內毋得出題六月甲子置廣文館解禮部狀近准都省批狀勘會開封府遇科場歲多有四方舉人冒貫畿縣戶名取應及太學生員依條須在

舉及一年方預就試其間有未及一年之人亦不免有寄貫取應之弊檢會舊制國子監取應舉人先于廣文館補試給牒取應今欲復置廣文館生員送禮部看詳立法申尚書省禮部檢校貢舉敕進士解額開封府一百人國子生四十人其諸科依舊條開封府二百四十人本部昨已曾乞將諸科量留四十人解額外其餘二百人并開封進士及國子生共為三百四十人發解廣文館生員今再行看詳開封府進士解額一百人即乞依

舊外將本府諸科二百人并國子生四十人共二百四十人解額并撥屬廣文館以補中生員每十人發解一人從之八年二月御史中丞李之純言比歲朝廷十科取士之令蓋已行之累年近臣所薦者多而拔用甚少乞委輔臣詳擇稍能進任其智勇過人可備將帥科多是武臣推舉其類必有可用之人宜加考察三月庚子中書省言進士御試答策多係在外準備之文工拙不甚相遠難于考校祖宗舊制御試進士詩賦論三題施

行已遠前後得人不少今朝廷見行文字多係聲律對偶非學問該洽不能成章若朝廷不復行祖宗三題舊法則學者未知朝廷所向檢書已降指揮將來一次科場如有未習詩賦舉人許于舊法取應解發合格人不得過解額三分之一以後並兼試詩賦詔來年御試將詩賦舉人復試三題經義舉人且令試策後復全試三題其雜犯舉人未得黜落別作一項聞奏五月癸卯禮部尚書蘇軾言伏見元祐貢舉敕諸詩賦論題于子史

書出如于經書出而不犯見試舉人所治之經者聽今
令相度欲乞詩賦題許于九經孝經論語子史并九經
論語注中雜出史不避見試舉人所治之經但須于所
給印紙題目下備錄上下全文并注疏不得漏落則本
經與舉人所記均一更無可避兼足以示朝廷待士之
意本只以工拙為去取不以不全之文掩其所不知以
為進退于忠厚之風不為無補詔依奏今來一次科場
未得出制度題目

紹聖元年春正月戊子禮部言諸州軍就試進士及千
人以上差點檢試卷官二員每增五百人添一員人數雖
多不過六員從之丁酉蔡安特言貢舉勅五百人以上
差點檢官一員千人以上差二員既舉試官分定考試
又獨力點檢試卷實恐力有不逮若以不犯考試卷為
合格止坐點檢官獨試官無責必不加意考校顯見條
約交互未為均便欲乞除在京外於貢舉敕內改點檢
官為考試官字所貴五百人以上添官考校同心合議

參定去留士無遺濫從之三月丁丑詔今次御試舉人依舊試策庚辰監察御史郭知章言復元豐上舍推恩之例以廣樂育之盛德詔太學合格上舍生上等推恩免省試每次科場不得過二人仍附春榜人數乙酉上御集英殿進士策復詞賦之選而士不加能勸常平之官而農不加富可催可募之說雜而役法病或東或北之論異而河患滋賜土以柔遠也而羌夷之侵未弭弛利以便民也而商賈之路不通至于吏員猥多兵備剋

缺飢饉荐至寇盜尚蕃此其故何也夫可則行否則草
惟當之為貴人亦何必為子大夫其悉意陳之母隱中
書侍郎李清臣之詞也乙未三省言擬到武舉人推恩
策入優等上三人與右班殿直四人以下與三班奉職
減三年磨勘武藝絕倫更減二年磨勘上舍更減二年
磨勘不入等與三班差使減年磨勘有差從之丁酉上
御集英殿賜進士

畢漸唐寅趙莞堂劉藝王孝迪程
奮楊皓唐恪呂頤浩張綱李天任漸

等以下通禮諸科經律及第出身者六百人時初官取

考答策者多主元祐楊畏覆考專取主熙寧元豐者故漸為之首四月壬申殿中侍御史許亮采言罷十科貢士法從之三年秋七月乙卯國子司業龔原言將來科場只令依古專治一經從之四年春正月知貢舉給事中

徐鐸起居郎沈銖同知貢舉

蔡蹈言給事權官附月末

二月庚辰詔

罷春秋

古本云詔罷春秋科先帝以經術進士而春秋不設科以魯史亡有不可考士不能通故也元

祐又設令罷之新錄辨云不設春秋科舉王安石偏見私意也

閏二月己酉御集英殿

禮部奏名進士

葉夢得程經楊鳴忠何昌言謝克家呂天惠

三月甲子御集

英殿放奏特名進士及諸科并武舉人內謝師古本貫
鬱林州陳漢奇本貫高州詔以遠人各賜絹二十疋李
惟岳以高年賜絹一十疋是日未啓封者三人程文至
第四人展讀千百字曾布與蔡卞俱云文字顯不如第
三人恐不須讀啓封乃章惇之子特也至第五人宣諭
云對策言先朝法度當損益可降布曰事有適於時變
於人情固當損益恐無可降之理使先帝在位至今有
可增損亦當隨宜損益翰林學士承旨蔡京進曰先帝

則當損益陛下方紹述先志不當損益布曰恐無此理
上顧卞曰如何卞曰不知如何損益京曰但言事合損
益者不可不損益布曰如此乃是卞亦默然上曰更不須
降然卒降第七人及啓封則李元膺乃察之子也布又
曰第二人方天若程文中言元祐大臣當一切誅殺又
言子弟當禁錮資產當籍沒而不籍沒古今政事無此
義理此奸人附會之言不足取上曰只是敢言布曰此
有所憑恃非敢言也天若乃蔡京門客上曰不知布曰

前放榜一日章惇問臣曾諭否布曰不聞惇曰有一舉人論元祐人當誅上甚稱之既而林希為臣言此天若及于放榜惇亦對蔡卞言惇知此必天若卷子臣曰恐是惇曰何恐之有決知是天若也上乃曰惇何以知布曰非天若不敢爾惇所以知之况京乎林希曰天若在京家安下布曰惇每言人臣不敢欺罔此誠至論陛下深居九重若谷人臣欺罔何所不至如天若欺罔孰大于此上頷之天若興化軍人也

元符元年冬十月壬辰三省考試所試宗室文字合格者八人詔各遷秩內士陳仍賜進士出身三年三月己

丑知舉徐鐸上合格進士庚寅詔貢院就放李釜

范致明張

邦昌孫宗監孫安國黃潛善毛友童王安中孫博等以下五百五十人及第出身

釜大名人也

建中靖國元年二月都水監丞李夷行乞復詩賦科與經義並行彭汝霖劾夷行非所宜言且云若不懲戒則議欲壞神宗法度者將接踵而起左僕射韓忠彥收其

章不行汝霖又言陞下方以繼志述事為治專用經術
取士而夷行狂瞽妄說儻不明降指揮則天下不知禁
夷行遂罰金崇寧元年七月辛亥詔進士勿治春秋

徽宗

崇寧二年三月知舉安惇上合格進士李階等丁亥御
集英殿策試初賜霍端友蔡佃宇文粹中王賞彭俊民
楊時汪藻王次翁王庚劉湜史汝士任稼孟庚任居實
汪伯彥張守等以下三百三十八人及第出身端友武

進人階深之子而陳瓘甥也時特奏名安忱對策言
使富人之子階魁南宮多士無以示天下遂奪階出身
而賜忱第惇兄也又黃定等十八人皆上書上臨軒召
謂之曰卿等攻朕短可也神宗哲宗何負于卿等亦並黜
之三年十一月甲戌幸太學及辟雍司業吳綱蔣靜各
遷一秩官論定學之士鄭南程振朱丁葉祖義汪至平
林徽芝等十六人學官推恩有差南侯官人也四年九
月乙卯御崇政殿賜上舍生俞栗胡邦彥朱勝非楊邁等

以下三十五人及第出身
泉江寧人也冬十月丙辰置
諸路提舉學事官羅靖雜記
曰宗寧三年罷科舉三年
歲貢法成三舍天下教養
人為士二千一百餘員為
屋九萬二千餘楹費錢三百
四十萬餘緡米五十五萬
餘石五年三月辛丑知舉
朱諤上合格進士吳侗等
癸卯御集英殿策試遂賜
蔡嶷唐綰楊郁勝庾劉亮
李南強蘇元老胡世將王
韶劉觀帥內馮熙載王鈞
宋輅吳渭楊廣李光徐銳
杜充趙鼎等以下六百七
十六人及第

出身個烏程人疑開封人也十一月己丑大司成薛昂言武士之制未備請倣文士為升貢之法乙巳詔從之大觀元年六月癸酉御集英殿賜上舍生李邦彥段拂等以下二十九人及第邦彥河內人也初懷州教授眉山任諒試諸生邦彥每中優第至是果第一諒嘗作新學記上重其文有旨取以入上曰文士也遂擢提舉夔路學事二年知舉余深上合格上舍生戊寅御集英殿賜王侯以下十三人及第侯成都人也三年三月庚戌御

集英殿策試賜賈安宅楊渾唐重聶山史直之孫高李
沆文彥奇孫癰史祖道任穎宇文黃中史旂李天民史
與權以下六百八十五人及第出身安宅烏程人也先
是中書侍郎林攄唱進士第姓甄而呼堅名盎而呼快
于是中丞石公弼論攄不學無術傳笑中外夏四月戊
寅罷攄知滁州四年三月先是知舉王圖南上合格上
舍生丙寅御集英殿賜劉日新以下十五人及第日新
麗水人也

政和二年二月壬子知舉蔡疑上合格進士路允迪等三月己巳御集英殿策試遂賜莫儔程洵武万俟卨李從史易用唐允彰張乘宋昌史與權王純仁石有中余堯佐師與史機孫延宋朝英楊師錫王資孫坦程林呂天覺王升許允等以下七百一十人及第出身允迪應天人儔餘杭人也初御史李章言作詩害經術自陶潛至李杜皆遭譏詆詔送勅更立法宰臣何執中遂禁人習詩賦至是儔榜不賜御詩而賜箴未幾知樞密院吳

居厚侍御筵進詩改為口號後聖作屢出士大夫亦不復守禁矣二年二月壬子知舉俞鼎上合格上舍生癸酉上御集英殿賜陳公輔胡松年胡興乂等以下十九人及第公輔天台人也四月二日庚戌知舉張克公上合格上舍生丁巳御崇政殿賜張綱蔡居中汪萬頃以下十七人及第綱金壇人也初克公與同知舉霍端友宇文粹中皆太師蔡京所不喜者時中丞蔣猷劾貢院必有違法邀名之事下開封尹王韶體量得知舉聯名書

曉示一事以為邀名而門下侍郎余深言曉示書名以結兩學之心此風不可長克公因以劄自辨上言祖宗朝有三元今張綱有四元克公等又奏綱凡五魁多士及是唱名侍立上以為得人知舉官有賞於是深語塞而猷亦色變焉五年二月知舉王黼上合格貢士傅崧卿等三月己卯御集英殿策試遂賜何栗馬守傅中行秦檜宇文衷純郭封呂大受賀允中史渠田孝孫等以下六百七十人及第出身崧卿山陰人栗仙井人

也六年三月壬寅知舉慕容達上合格上舍生癸丑御
崇政殿賜臧瑀以下十一人及第瑀鄱陽人也七年三
月甲辰知舉蔣猷上合格上舍生庚戌御集英殿賜景
徹以下十二人及第徹永康人也八年二月己卯知舉
陸德先上合格進士何大圭等三月戊戌御集英殿策
試有司考加王楷在第一上不欲令魁多士遂賜王昂
周天衢周望孫之才楊裕師成石粹中湯朋舉任銳師
庚程敦臨史似史充張俊等以下七百八十人出身大

主晉陵人昂開封人也

宣和元年三月己未知舉陸德先上合格上舍生程文高下失當另別求升降辛未御崇政殿賜王俊乂以下五十四人及第俊乂海陵人二年二月知舉王孝通上合格上舍生程文三月壬寅詔貢院所定不倫乙夜親覽次其高下遂御崇政殿賜祖秀實以下三十一人及第秀實蒲城人也二年二月乙酉詔罷三舍并諸路提舉

學事官

蔡攸史稱曰宣和三年二月詔罷辟雍而取士以科舉之目者梁師成之言也時王取為左相用事

而師成從中重權以相表裏因取天下瞻學錢始言作
糴本謂若封樁者事定悉歸應奉司為伎淫巧實本旨
云
癸巳知舉趙野上合格進士宋齊愈等三月丁未御

集英殿策試遂賜何渙宋齊愈范宗羽楊楚材史藻席
益陳康伯何知柔楊環文之奇朱雖楊羽衡楊師心杜
軫馮舜臣史度師敏功等以下六百三十人及第出身
時有二士對策甚直初考陸德先輩欲重致其罪而詳
定官李邦彥見而奇之奏乞聖裁遂置甲乙科乃劉寧
止范宗尹齊愈臨叩人渙永康人宗尹鄧城人也四年

二月癸巳初貢院點檢除朝廷選外餘聽知舉奉辟既久遂成私舉已詔罷奏辟至是言者謂春秋銓試今尚奏辟亦合依貢院法丙辰詔從之五年三月詞學兼茂科選人秦檜循一資檜江寧人六年閏二月知舉宇文粹中上合格進士楊椿等庚子御集英殿策試遂賜沈誨周執羔王翼楊允恭柯柏熊沈灼文濤常一王椿時衍之郭由中孫宗鑒史光閻安祺朱倬李就孫廷揚程驥史寅鄭克蘇欽唐迪孫伯達樊汝霖鴻時行趙沂楊

時牟國才范游史和駿魏發等八百人及第

以貢士人衆特添省

額一百人賜御製詩

椿眉山人晦錢塘人文通孫也時內侍梁師成

交通賓客招賕賄士人納錢數千緡即令赴廷試以獻
頌上書為名而官之至百餘人及唱第之日侍于上前
奏請升降皆出其口其小史儲宏者亦登第而執廝養
之役如初七 years 上舍三人元盥黃應南王師亮等並賜

同出身

建炎以後不錄並在後集

太平治迹統類卷二十七